



Xalq so'zi

O'zbekiston —
kelajagi
buyuk
davlat

2024-YIL — YOSHLAR VA BIZNESNI QO'LLAB-QUVVATLASH YILI

1991-yil 1-yanvardan chiqqa boshlagan

WWW.XS.UZ

E-mail: Info@xs.uz

2024-yil 31-yanvar, № 23 (8646)

Chorshanba

Saytimizga o'tish uchun QR-kodini
saytning orqali skaner qiling.



BIRINCHI PREZIDENTIMIZ YODGA OLINDI

Prezident Shavkat Mirziyoyev 30-yanvar kuni
Toshkent shahrida Islom Karimov haykali poyiga gulchambar qo'ydi.



Tarixiy xotirasiz kelajak yo'q. O'zbekistonning mustaqillikka erishishi va davlat qurilishida Birinchi Prezidentimizning ulkan xizmatlari borligini hurmat bilan yodga olamiz.

Davlatimiz rahbari Shavkat Mirziyoyevning e'tibori bilan uning xotirasi abadiylashtirildi, maqbarasi barpo etildi. Islom Karimov tavallud topgan 30-yanvar

kunini nishonlash an'anaga aylandi.

Fidoyilarini e'zozlagan xalq hamisha hurmatga sazovor. Xotira tadbiri buning yana bir ifodasi bo'ldi. Qur'on oyatlari

o'qilib, duo qilindi. Birinchi Prezidentimizning O'zbekiston manfaatida qilgan ishlari, insoniy fazilatlarini yodga olindi.

Islom Karimov nomidagi ilmiy-ma'rifiy yodgorlik majmuasida o'tgan marosimda

Oliy Majlis palatalari, Prezident Administratsiyasi va hukumat vakillari, ilm-fan va madaniyat namoyandalari, shahar jamoatchiligi ishtirok etdi.

Birinchi Prezidentimizning

Samarqand va Qarshi shaharlaridagi haykallari poyiga ham gullar qo'yildi.

O'zA.

O'zbekiston Respublikasi Prezidenti
Matbuot xizmati suratlari.

O'zbekiston — Xitoy:

INSON KAPITALI UCHUN SARMOYA

Endi nafaqat tovar, balki bilim ham ayirboshlaymiz.

"Samoviy imperiya"... Bu — Yer yuzi aholisining qariyb beshdan bir qismi yashaydigan davlat — Xitoyga tegishli ta'rif. Dunyoga yangidan yuz ochayotgan yangi O'zbekiston esa "Markaziy Osiyo yo'lbarisi" deb e'tirof etilmoqda.

Xo'sh, jahonning ikkinchi eng yirik iqtisodiyotiga ega va hatto 2030-yillardan keyin bu borada birinchi raqamli mamlakatga aylanishi prognoz qilinayotgan Chin yurti bilan bizni yanada yaqinlashtirayotgan, jipslashtirayotgan nuqtalar qaysi?

O'tgan haftada Prezidentimizning ushbu mamlakatga qilgan davlat tashrifi davomidagi samarali uchrashuv va erishilgan manfaatli kelishuvlar misolida bu savolga javob topdik.

Hamkorlik

Uzoq kuttirmagan rekord natija

Tan olish kerak, Xitoy muhim xalqaro jarayonlarning mas'uliyatli ishtirokchisi. Jahon siyosati va boshqaruvda peshqadamlardan biri. O'ttiz yildan ko'proq vaqt ichida qashshoqlikdan qariyb 18 trillion dollarlik iqtisodiyotga ega bo'lgan davlat.

Xitoy biz uchun qanchalik strategik ahamiyatga ega bo'lsa, Xitoy uchun ham O'zbekiston shunchalik muhim. Natijada ikki davlat Markaziy Osiyodagi masalalarni hal qilish, muhim ta'minot zanjirlariga ulanish, oziq-ovqat xavfsizligi, ta'lim kabi masalalarda hamkorlikni rivojlantirmoqda.

O'zaro muloqotlarda qayd etilganidek, ikki mamlakat yetakchilarining siyosiy irodasi va



birgalikdagi sa'y-harakatlari tufayli O'zbekiston va Xitoy munosabatlari barcha soha va yo'nalishda misli ko'rilmagan darajaga ko'tarilib boryapti.

O'tgan yilda birgina tovar ayirboshlash hajmi 50 foizga oshib, rekord ko'rsatkich — 14 milliard dollarga yetgani buning yaqqol tasdiqi. Boshqacha aytganda, o'tgan yil yakunlari bo'yicha tovar ayirboshlash 14 milliard dollarga yetgan bo'lsa, yaqin istiqbolda buni 20 milliard dollarga yetkazish uchun imkoniyatlar mavjud.

Qolaversa, keyingi yillarda Xitoydan O'zbekiston iqtisodiyotiga investitsiyalar hajmi besh barobar, qo'shma korxonalar soni esa uch barobar oshgani yanada quvonarli.

Eng muhimi, hamkorlik ko'lami nafaqat

savdo-iqtisodiy, balki madaniy-gumanitar, ilm-fan, ta'lim sohalarida ham izchil rivojlanib bormoqda va bu aloqalar bugun yo'q kecha paydo bo'lgani yo'q...

Buyuk Ipak yo'lida tutashgan tarix...

Bizning tarixiy aloqalarimiz ikki ming yil avval asos solingan Buyuk Ipak yo'lining boshlanishiga borib taqaladi, u orqali jahon savdosining asosiy qismi o'tgan. Bunga Miloddan avvalgi I-II asrlarga mansub yozma manbalar va zamonaviy O'zbekiston hududidagi arxeologik topilmalar dalil bo'ladi.



Muloqot

LOYIHA DOIRASIDA AMALGA OSHIRILAYOTGAN ISHLAR TAHLILI

Oliy Majlis Senati Raisi, Odam savdosiga qarshi kurashish va munosib mehnat masalalari bo'yicha milliy komissiya raisi Tanzila Norboyeva Xalqaro mehnat tashkiloti, Xalqaro moliya korporatsiyasi va Jahon banki vakillari bilan videokonferensaloqa shaklida muzokara o'tkazdi.

Shu o'rinda aytish joizki, o'tgan yili may oyida Xalqaro mehnat tashkiloti va Xalqaro moliya korporatsiyasining paxta-to'qimachilik sanoatida munosib mehnat standartlari va tadbirkorlikni rivojlantirishga qaratilgan "Better Work" qo'shma dasturini O'zbekistonda tatbiq etish bo'yicha memorandum imzolaniib, loyihaga start berilgan edi.

Uchrashuvda mamlakatimizda ushbu loyiha doirasida amalga oshirilayotgan ishlar, kelgusidagi ustuvor vazifalar muhokama qilindi.

Xalqaro tashkilotlar vakillari tomonidan O'zbekistonda munosib mehnat tamoyillarini ilgari surish, ishlab chiqarish jarayoniga jahoniy standartlarni, xususan, ishlab chiqarish, texnik, mehnat va ekologik standartlarni keng tatbiq qilish, ishchilarning huquq va manfaatlarini har tomonlama himoyalash, ularning ijtimoiy muhofazasini ta'minlash borasida keng ko'lami ishlar bajarilayotgani e'tirof etildi.

Ayni chog'da Odam savdosiga qarshi kurashish va munosib mehnat masalalari bo'yicha milliy komissiya mamlakatimizda mehnat sohasidagi xalqaro standartlarni ilgari surishga munosib hissa qo'shishi aytib o'tildi.



"Osiyo kubogi — 2023"

O'ZBEKISTON TERMA JAMOASI CHORAK FINALDA

Shu kunlarda Qatar yashil maydonlarida davom etayotgan futbol bo'yicha Osiyo kubogining chorak final ishtirokchilari aniqlanmoqda.

Kecha S. Katanes murabbiyligidagi O'zbekiston terma jamoasi nimchorak finalda Tailand terma jamoasiga qarshi maydonga tushib, 2:1 hisobida zafar quchdi. Mazkur mamlakatlar futbolchilari shu kunga qadar turli musobaqalar doirasida 12 marotaba kuch sinashib, 6-martadan g'alaba qozongan. O'zaro o'yinlarda durang natija qayd etilmagan.

Bevosita uchrashuvga to'xtaladigan bo'lsak, o'yinning dastlabki daqiqalaridanoq hujumga o'tgan futbolchilarimiz tezkor gol urishga harakat qilishdi. Biroq Oston O'runov, Jaloliddin Masharipov va Diyor Xolmatov qulay vaziyatlardan foydalana olmadilar. Bahsning 37-daqiqasiga kelibgina hisob ochildi. Diyor Xolmatovning mohirlik bilan uzatgan to'pini Aziz Turg'unboyev raqib darvozasiga aniq yo'lladi. Hisob — 1:0.

O'yinning 2-bo'limida esa jamoalar

bittadan gol urib, yakuniy natijaga nuqta qo'yishdi. 58-daqiqada tailandlik Supachok Sarachat va 65-daqiqada Abbosbek Fayzullayevning uzoqdan yo'llangan zarbalari darvozabonlar qaytara olmadilar — 2:1.

Shu tariqa O'zbekiston terma jamoasi chorak finalda Qatar terma jamoasiga qarshi bahs olib boradigan bo'ldi. Uchrashuv 3-fevral kuni Toshkent vaqti bilan soat 20:30 da boshlanadi.

Nimchorak finalning boshqa uchrashuvlarida quyidagi natijalar qayd etildi: Avstraliya — Indoneziya 4:0, Tojikiston — BAA 1:1 (penaltilar seriyasida 5:3), Iroq — Iordaniya 2:3, Qatar — Falastin 2:1, Saudiya Arabistoni — Janubiy Koreya 1:1 (penaltilar seriyasida 2:4).

Sunnatilla ISLOMOV
(«Xalq so'zi»)



Oliy Majlis Qonunchilik palatasida

AHOLI MANFAATLARINI KAFOLATLASHDA ZARUR HUQUQIY ASOS YARATILADI

Oliy Majlis Qonunchilik palatasining navbatdagi majlisi bo'lib o'tdi. Unda dastlab Prezidentimiz raisligida davlat va jamiyat hayotida muhim ahamiyatga ega bo'lgan uy-joy va kommunal xo'jaligi, qurilish, transport va ekologiya masalalari yuzasidan o'tkazilgan videoselektor yig'ilishida davlatimiz rahbari tomonidan ushbu sohalaridagi imkoniyatlar chuqur tahlil qilinib, kelgusidagi ustuvor vazifalar ham belgilab berilgan qayd etildi. Shuningdek, mamlakat ijtimoiy-siyosiy hayotiga oid bir qator qonun loyihalari ko'rib chiqildi.

Mahalliy ishlab chiqaruvchilarga soliq imtiyozlari

Majlisda "O'zbekiston Respublikasi Soliq kodeksining 483-moddasiga mahalliy zargarlik buyumlarini ishlab chiqarishni qo'llab-

quvvatlashga qaratilgan qo'shimcha kiritish to'g'risida"gi qonun loyihasi ikkinchi o'qishda muddamodda ko'rib chiqildi.



